

清  
宣  
統  
翰  
外  
文  
史  
精

卷  
十  
二  
册



清宣統朝外交史料卷十二 宣統元年十一月下至十二月

目錄

外部致袁樹勳澳門界事停議請飭維持舊狀勿生事端電十一月二十五日

外部致郵部安奉路需用地畝應否照表購買請核覆文二十五日

總稅司裴式楷呈梁尙書敦彥請鈔送安奉路合同函二十五日

東督錫良致外部松花江貿易試辦章程請駁拒電二十五日

稅務處咨外部鈔送東省督撫籌辦開埠事宜電請查核文附電稿二十七

巴西代使吉致外部請示知中國領海管理權專律照會附節略二十七

外部丞參呈堂憲研究外國船在中國領海內應如何施行司法權

事繕單呈核文二十八日



郵部咨外部安奉路需用地畝請將原開數目聲覆文二十八日

學部奏擬准外國學生入經科肄業並酌訂簡章片二十九日

魯撫孫寶琦咨外部與德商簽訂收回五礦合同請查核文

附合同二十九日

外部致度郵兩部美外部謂保全中國東省鐵路主權須先贖回錦

璦路希詳覆函十二月初二日

外部致陸徵祥和使遇有照會必加駁拒希告和外部電初二日

外部咨郵部安奉路需用地畝本部並無原開數目文初二日

直督陳夔龍致外部承函以贖軍糧城爲宗旨藉結滇案當遵辦電

初六日

使和陸徵祥覆外部來電告和外部彼責貝使不合電初六日



外部奏擬設巴那瑪總領事各官員缺揀員派充摺初六日

郵部致外部錦瓊鐵路借款擬先定大綱再商合同函初六日

署粵督袁樹勳致外部越督擬改對汎俟會商後籌辦電初八日

錫良程德全致外部安奉路所需地畝俟繪就圖說再呈電初八日

度支部等會奏遵議密籌延吉善後事宜摺初九日

澳門勘界大臣高而謙咨外部差事已畢呈繳關防文初十日

濱江關道施肇基稟外部譯呈俄員所擬稅鈔節略並哈爾濱等關

試辦章程函附節略一件章程三件初十日

外度郵三部會奏議覆借英美款興築錦瓊鐵路摺初十日

西藏公會呈外部請將聯大臣及兵隊撤回查辦電十二日

外部咨張蔭棠答覆南美巴利維亞國國書希轉遞文十五日

外部致李經羲河內設領一層法人並無異議電十五日

滇督李經羲致外部邊界警察事關三省謹陳辦法電十七日

外部覆美使費錦瓊鐵路借款合同應由東督與美英公司妥商改

訂照會十七日

專使唐紹儀奏報考察各國財政情形摺二十一日

外部致袁樹勳葡外部稱現無兵艦赴澳希飭曉諭電二十四日

外部致陳昭常鈔送揮延設關與俄使往返照會函二十八日

署粵督袁樹勳覆外部據澳督云葡艦或來中國電二十九日

日俄法使致外部借美款建築錦瓊鐵路事務請慎重照會  
八件二十  
九日

清宣統朝外交史料卷十二

男希隱亮編

黃巖弢夫王彥威輯

孫孝章敬立校

外部致袁樹勳澳門界事停議請飭維持舊狀勿生事

端電

申澳界事葡使照稱奉政府命以此事既經停議只有歸海牙公會判定方能議結且足解除鄰境居民之憤永久相安前有惡徒鼓動百姓使兩相猜疑故應於未判定前照約各持舊狀馬楂度到京會晤亦仍本此爲言經本部先後切覆告以該處界務係中葡之事所關繫者係



中葡之民始終應由兩國和商萬難公斷近日英使來照堅稱葡請調處爲有理並引英葡舊約謂設有攻擊之舉英有力助葡國之責特預聲明本部覆以所引條約與事實不符照令轉報政府無庸誤會各等語查界務現雖輟議俟高大臣與駐法劉使回京後詢明情形自當會商一妥善辦法以期有所結束現我既堅持不允公斷英葡兩國必以彼處百姓鼓動攻擊爲詞謂我恃強欺逼應由尊處嚴飭該地方官妥爲彈壓或另派一明幹委員暫駐該處隨時勸導總以維持舊狀勿生事端致令有所藉口爲要除將來往照會附函鈔寄外希核辦電覆外

十一月二十五日澳門檔

外部咨郵部安奉路需用地畝應否照表購買請核覆

文

爲咨行事宣統元年十一月二十二日准東三省總督奉天巡撫咨稱據交涉司呈稱安奉鐵路各車站需用地畝照南滿鐵路會社原開數目計分甲乙丙丁戊五等除安奉兩端大站另議外如本溪縣等處乙站竟需地至九百二十畝之多迭經前署司暨購地局局長與南滿公同暨日本總領事往返商減嚴定用地限制聲明此項土地專限於鐵路及鐵路業務必要事項之使用不得用爲其他之經營至火車站位置等當與我國官憲妥商決定如用地內欲設馬路時必須先商請地方官得其許可後始得實行等因彼此議定各以公文作據在案現據南滿會社送到商減車站用地數目表暨圖說各件經本司詳加覆核

照原開用地數目已減去過半調查沿路車站用地似屬無從再減應否准其照表開數目分別購買理合備文呈請鑒核並轉咨外郵兩部核示祇遵等情查安奉鐵路需用地畝迭經派員往返商減嚴定限制按照此次表開數目似屬無可再減究竟應否照表所開數目分別購買相應鈔表備文咨行貴部查核見覆等因前來查此事已由該督撫分咨貴部事關路政應如何核辦之處相應咨行貴部查核見覆可也須至咨者十一月二十五日安奉鐵路檔

總稅司裴式楷呈梁尙書敦彥請鈔送安奉路合同函  
敬肅者日本伊集院公使前致貴部照會詢問安東收稅情形茲正研究是事應請將新與日本訂立安奉鐵路合同鈔錄一分擲下以便詳



查該合同所言鐵路及邊界等事此次答書極應謹慎內有數事雖該使於照會內並未明言惟於會晤本總稅務司時卻曾提及業經本稅司報告在案即如火車運載之貨物由高麗過鴨綠江入中國者之稅則日後該使或將提議似應早爲預備中國曾否經人要請曾否自行允許將高麗南滿鐵路在安東接線日本必謂高麗爲日本所保護南滿鐵路爲日本所承築接線之事可無庸請諸中國雖此種議論未必有理然日本必以爲言也十一月二十五日安奉鐵路檔

### 東督錫良致外部松花江貿易試辦章程請駁拒電

據哈爾濱施道肇基電稱松花江貿易試辦章程現部與俄使商准派職道會同稅司與俄員在哈商改於本月十五日十一鐘在領署開議

職道與葛稅司向俄員屬將彼所擬議之事開送節略一分以便逐條  
詳細譯閱再行酌議俄人不允即擬分條提議俟甲條議定再議乙條  
職道與稅司商酌向來會議無此辦法遂堅不允俄人之請始將原章  
程閱看宣讀甫一啟口即請將稅司所出告示內案奉劄行字樣改爲  
下開章程業經中俄兩國派員商准云云並要求立予回音原章亦停  
止不再開誦職道等再三詰辯始接誦原章每誦數行必有指摘又力  
索回音職道等置不予答如是者數次甫誦畢總綱四條時近一鐘卽  
停議訂於十八日未刻爲下次議期職道等仍索節略此意堅持到底  
嗣由某俄員轉圜允先將總綱十四條內現擬議改之處日內開一節  
略送閱是日彼所議改之一其最有關繫者如章程題目改作按照愛

彈及光緒七年條約中俄互商定准之章程又總綱第一條彼稱俄有  
松花全江貿易利權不認商埠與內地之分別又第四條貨物入官彼  
請改定罰款銀數無庸將貨物充公各節等語除俟節略送到隨時續  
陳銑又據嘯電稱俄人請改試辦章程內總綱各款節略昨已送到茲  
將有關條約之款譯漢電呈章程題目俄人請改曰哈爾濱特派議員  
商定由關稽查松花江往來船隻暨進出口貨物暫行試辦章程底稿  
第一條甲乙辦法請刪除另議曰俄華船隻按照愛彈聖彼得堡條約  
准向松花江全流任便往來貿易之獨利照以下所開之章程辦理再  
總綱末尾一節之第二段請改曰所有行船理船防疫專章並給發專  
單暨軍火憑照章程以及各該章如有更改及加減之處須按照光緒



七年條約第十八款彼此商准後方能頒布各節因以上各條均與光緒七年條約第十八款有關究應如何與議之處請速電示遵辦查德美二領事月初先後來署面稱聞華官即日與俄人開議更改現行貿易章程惟松花江之哈爾濱三姓等處旋經開放爲各國商埠目前如有更議彼國代表亦應與議並聞松花江行輪俄人如要求專利中國將何以覆之等語職道覆云所定貿易暫行試辦章程早經頒布其中並無獨准俄人專利之說亦無禁止他國船隻之語今因俄人屢次齟齬部憲始允商改窒礙之處以期盡善云云以上德美二領對於松花江貿易事宜之意見並以稟聞各等語先後到院查松花江貿易試辦章程六月間由鈞部與俄使磋商經俄使照覆允認在案惟其中細節

如於俄商有所窒礙之處則可由俄員與我商議今俄員請將章程題目更改直欲翻改從前俄使之承認殊屬無理其第一款甲乙兩項係規定船舶行駛各通商口岸及內地時應行報關完稅之辦法萬難更改況俄國在樸資茅斯與日本所訂之約已將松花江行船獨得之權利讓出現在中國在各該處開通商埠係實行中日條約俄國早已承認何得尙以獨利爲請均應據理駁拒至末尾兩節第二段俄人請改之處尤屬不合查中俄條約並未許其干預我國管理船舶之權且防疫及給發專照等事爲我國主權之作用亦爲海關之專職斷無須與俄人商議亦應一併駁拒除電覆施道遵照外相應合併電達鈞部鑒

核良有十一月二十五日稅務檔

稅務處咨外部鈔送東省督撫籌辦開埠事宜電請查

核文 附電稿三件

爲咨行事准東三省總督及奉天吉林黑龍江等省巡撫先後鈔送各該省籌辦開埠事宜電共三件到處相應照錄原電咨行貴部查核辦理可也十一月二十七日商埠檔

照錄黑撫周樹模電

稅務大臣鈞鑒洪頃准咨開江省劃分商埠內地事宜籌辦有無端緒等因查江省之省城愛琿滿洲里海拉爾四處均定爲自開商埠惟滿洲兩處因東清鐵路佔界輻轆尙未劃定正在籌議辦法一俟開辦再行繪具圖說咨請查核至稅務事宜凡在商埠界外均照內

地辦理遵先電覆模歌十一月初六日

照錄東督錫良奉撫程德全電

稅務處鈞鑒奉省各商埠約章內載均係自行開放前准感電業經前督徐前撫唐劄飭交涉司轉行開埠各地方官從速籌備相當地址劃作商埠以便與洋商爲公共居住貿易之所嗣據新民等處地方官集紳商會同擬議相當地方陸續繪圖送經交涉司呈核查擬定地段均在火車站暨附近之處既便交通即所定方里亦足敷用尙稱合宜應早劃定以清界限第奉省情形外在城鎮雜居者已屬不少該司迭與駐奉各領事面商劃清埠界辦法各領均欲堅執全市通商之說侵我稅權現彼此均未承認埠地亦有照常徵稅者

然埠界一日不定一切皆無妥實辦法易損主權且非長策至省城商埠早經前督趙圈定小西邊門外田畝插立標誌各國人民有向界內稟請租用者正擬飭司分別另繪圖本呈送核定照會駐京公使核辦茲准咨詢除備文咨送並咨呈外務部查核辦理外謹將籌備情形先行電覆即希查照爲禱良全歌十一月初七日

照錄吉撫陳昭常電

稅務大臣鈞鑒洪前於二十五日接准貴處咨查吉省商埠劃界籌辦情形當經分電延吉揮春三姓哈爾濱等處飭查茲據電覆延吉埠地四處除六道溝埠界日領早經承認百草溝尙未提議外其餘局子街頭道溝兩處已與日領迭次磋商局子街亨字胡同以西街



道頭道溝廟宇附近街道如均添入埠內日領即能承認揮春稅關  
界限業已勘定東至關外渡口西至關帝廟南至紅旗河北至關外  
北大道若商埠界址克稅司堅謂宜包含稅關城廂在內郭道欲照  
各埠另劃地段彼此見解稍左尙未確定三姓商埠界址尙未劃清  
但已勘定在城東北沿江一帶現設江關左右其地名爲舊城以上  
各處有已劃定正在規畫中者惟哈爾濱一埠有鐵道佔用地之糾  
葛劃界甚爲棘手俄人視鐵道界內爲彼之領土祇承認我在傅家  
甸開埠我固不允而各國領事亦復不願相持至今秋俄使始允將  
路界沿邊之糧臺地方暨毗連之傅家甸湊成各國商場意在調融  
路界使商埠居於界內外之間聞各國尙有異議故哈埠之界至今

亦未能確定大約能辦到多割路界以內之地併入商埠使其路界衝破已爲得手此外如長吉兩埠址雖經劃定且已奏准撥款開辦但以洋商無內地雜居之例因此生出疑難問題查吉林長春兩處城內各洋商雜居有年長春之日人尤多且有自建屋宇者我於城外劃定商埠明定租建章程勢必令城內洋商悉遷入埠商埠內地之界始能分明否則商埠以外仍有外人雜居商埠與內地之性質即混合不清而收稅亦因之諸多掣肘故現在籌辦商埠不但在埠界之劃清而尤在外人居往地域之劃清假如商埠外仍有外人居住即與外人無雜居之例衝突我所指爲內地者彼仍可指爲商埠以通商口岸不應收稅爲詞克稅務司對於琿春開埠欲包含城廂

在內無非有鑒於此以上情形業由敝處委派西路道顏世清齎咨  
赴部請示辦法究應如何斟酌盡善之處須俟外部核覆定奪尙乞  
尊處更與外部接洽會商不勝盼禱除咨達外先此電覆昭常帶十

一月二十一日

巴西代使吉致外部請示知中國領海管理權專律照

會附節略

爲照會事竊本代辦奉本國政府之命調查貴國關於領海管理權三  
則謹列如下  
一在領海界內對於他國之船其警察裁判權有無限制  
二如甲國逃亡犯人被乙國捕獲於丙國船之內由該犯本國要求交

還應如何辦理

三領海界內有他國商船之犯事是否將犯人送至該船所屬之國審判抑即由犯事處辦理等因相應照會貴親王查照示知貴國專律如何俾得申覆本國政府以盡委任須至照會者十一月二十七日法律檔

第一問 如外國船隻上生有巡警拿人問題管理領海埠港之權是否有所限制

第二問 如甲國之逃犯在乙國領海內之丙國船隻上爲搭客時被拿而本國又索交還係作何辦法

第三問 如在領海內外國船上犯罪是否應歸該船所屬之國審判抑歸據有該領海之國辦理

對答上項問題須視爲萬國公法抑爲無治外法權之中國而設余  
今按照中國情形條答如下

一 治外法權得以施行於領海埠界與中國陸地無異中國對於  
外國船隻舉動實爲中法條約內數款所限制以下所譯之一千八  
百六十年中法條約第三十九款實足解說第一問

法國人民有約各國人民做此如有不協爭執事件均歸法國官員辦理遇有

法國人與外國人爭中國官無權干涉至於法國船隻按照一千八百四十四年

條約專指商船而言華官亦不能干涉均歸法官及該船主自行料理

觀此則可知中國巡警絕無權力能干涉法國船隻有約各國船隻做此雖有時

曾實行干涉然亦必預先得有領事或船主之應許



二 依余解說法律該犯在外國船上時中國按照上引條約斷不能干涉如遇此等事件譬如逃犯爲法人船爲德船依余之意無論華官法官苟非得船主或別項德官之允許不能捕拿此犯如犯人並未行出領海外國船主將其送交該犯所屬國之領事則中國無權可以干涉治外法權全由條約發生即任令外國官員管理其在華之人民財產之謂然如罪人已經逃出該管官員範圍領事或律官僅爲審判起見能否將其追回起岸此實一甚大甚新之問題外國或將謂彼之法堂可以任便辦理該國罪犯絕非中國之事此等議論余亦不能謂其允當也

三 如在中國領海內外國船上犯罪自歸該船所屬之國辦理然

如犯罪之人係第三國之民則不能如此依余觀之該船雖無法律限制大約亦必將該犯送交該犯所屬國之領事譬如英人在中國境內德國船上犯罪英官向德人要索德人自將該犯移交英官任憑按照英律審判定罪然亦可辯論該犯既在中國領海內犯罪全屬中國管轄之下與德國絕無關繫緣此等事件本屬中國範圍惟既無治外法權則英國實代中國行法也如治外法權不行之地在領海內外國船上犯罪則歸領有該海之國辦理該船如係兵船不在此例

外部丞參呈堂憲研究外國船在中國領海內應如何  
施行司法權事繕單呈核文

謹將外國船在中國領海內中國應如何施行司法權一事研究所得  
繕具清單恭呈鈞鑒

擬答巴吉使第一問

凡外國船泊於中國領海者所有船內生出民刑事事件倘於中國治安無礙或外國船之船長不求中國幫助中國即不干涉故中國之司法權及警察權對於外國商船實有如上所舉之限制惟有特別條約者不在此限外國船僅在中國領海通行者除有侵害中國利益之情事外中國概不干涉惟航海之警察規則概須遵照

謹按外國船在中國領海界內中國應如何施行司法權及警察權一事應分爲二節研究 一外國船在中國領海經過 二外國船在中

國領海停泊外國船僅在領水經過與領海國無大關係除有侵害領海國利益情事外似可不必干涉惟所有航海警察規則應一律使之遵照至於在中國領海停泊之外國船按英國主義除有特別條約者應遵約辦理外應使之全服我國司法權及警察權方與法理相符惟船內種種細微事件均由我國干涉不免生出種種外交爭端似嫌瑣屑故擬採用法國主義除案情重大有礙我國治安或由該船船長請求我爲之幫助外概不干涉如是既不失我主權又免外交爭論爲策似尙妥便是否有當恭候鈞裁十一月二十八日法律檔

謹將英法等國歷來辦法附呈鈞鑒

一外國商船通行領海時據英國主義凡通行領海之外國商船如

船內出有民刑案件亦歸英國管轄然僅在領海通過實與領海國無大關係於此而仍施行國權實多不便之處故學者多反對之一千八百九十七年萬國公法會議於此事件議定除有侵害領海國利益情事外領海國概不干涉故我國亦宜遵守萬國公法會議所議決者辦理方爲合宜惟航海之警察規則無論如何概須遵照

二外國船舶在領海停泊之時各國於此問題有二主義

甲英國主義 按此種主義蓋嚴行領土主權者當十九世紀之初各國莫不採用斯法故一千七百九十六年普國領海規則第五條內載凡在外國港內之普國船舶所有船內之普國人民如有民刑訴訟歸該地裁判所管轄又一千八百七十八年英國頒布領海裁



判條例凡在英國領海內

即自英國海岸三海里內之水面

所有犯罪案件不論其人

爲英人爲外國人在英船內犯罪抑在外國船內犯罪統歸英國裁判所管轄各等語具見此等主義實爲當時所通行且自法理論之此主義亦屬正當無誤惟外國船舶內發生種種細微事件一一皆由領海國干涉則外交上不免生出種種爭論且放任之置之不問亦於領海國毫無不利不便之處自十九世紀之初葉乃有所謂法國主義者出焉

乙法國主義 按法國主義凡在法國港灣之外國商船所有船內船員間之犯罪苟不紊亂法國港灣之秩序又不請求法國爲之幫助法國卽概不干涉如一千八百六年北美商船紐敦號及沙利號

事件法國即實行此種主義由北美領事自行管轄法國置之不問  
主義漸爲學者及實際上所採用如公法大家霍愛敦氏初極主張  
此屬地主義即英國主義謂船內發生之案件除有特別條約外概歸領  
海國管轄嗣見此案法國所採用之法制及判例乃幡然改圖極讚  
法國主義之方便謂主義深合公法之原則將來必可邀各國之承  
認云現在除英國一國外各國莫不採用此主義且一千八百九十  
八年之萬國公法會議亦承認法國主義決議參用之

### 擬答巴吉使第二問

謹按此問似係指犯人在本國犯罪乘他國船舶逃至中國境內由該  
國請將犯人獲交自行治罪問中國應如何辦理之意查交犯一事近

今學說指爲國際之道德不論有無交犯條約均應協力獲交以昭睦  
誼惟交犯一事應備左列五條件方爲合宜有此五條要件則不問其  
犯人在他國船上抑亦他種地方如在我國境內我國即宜設法獲交  
以符國際法律共助之義謹將要件列左

一須由該國將犯人姓名及所犯情節通知中國  
二所犯情節頗  
重且中國法律亦視爲有罪者  
三所犯非關涉政治  
四犯人非  
中國人  
五此人現在未曾在中國犯罪

謹按右舉各節擬答如左是否有當恭候鈞裁

凡犯人曾在本國犯罪逃至中國經該國將犯人姓名及所犯情節通  
知中國請爲獲交懲治中國當查所犯輕重又查中國法律上是否亦

視爲有罪如犯情頗重中國法律又視爲有罪則中國當設法獲交所  
有獲犯經費應由該國償還惟犯人如係中國人或所犯係屬政治犯  
人又此人現在中國犯有罪案則不能獲交但犯人之本國會與中國  
結有特別條約者一切遵約辦理

### 擬答巴吉使第三問

凡在中國領海內停泊之他國商船遇有工役在船內犯罪情事應  
按照案件之輕重及有無妨礙治安爲斷如犯罪甚輕且無礙中國  
之治安該工役即由該船所屬國管轄中國概不干涉如工役在中  
國岸上犯罪甚輕又於中國治安無礙則由中國地方官將該犯執  
交該船船長由船長責罰後通知中國地方官其案情重大有關中

國治安者仍由中國管轄惟有特別條約者不在此限

謹按本問亦可分爲二層研究 一工役在船內犯罪 二工役在岸

上犯罪工役在船內犯罪應如何辦法可照第一質問所答各節按其

情節輕重分別辦理至於工役在岸上犯罪按之法理不論罪之輕重

有無妨礙治安除有特別條約應遵約辦理外本應一律由領海國管

轄惟案情甚輕於領海國之治安又無甚妨礙不妨由領海國地方官

將工役執交該船船長由船長將工役責罰後通知中國地方官則彼

此均甚方便蓋往往有因地方官管轄此種細微事件致令船舶不能

起碇殊多不便之處如先年日本船在英屬瑪島曾演此事嗣經幾許

交涉該島太守乃設法措辭將該犯交還船舶始能起行故工役犯情



甚輕而無礙者以執交該船長責罰爲便也

郵部咨外部安奉路需用地畝請將原開數目聲覆文  
爲咨行事路政司案呈准東三省總督奉天巡撫咨稱據交涉司呈稱  
安奉鐵路各車站需用地畝照開南滿鐵路會社原開數目計分甲乙  
丙丁戊五等除安奉兩大站另議外如本溪縣等處乙站竟需地至九  
百二十畝之多迭經前署司暨鐵路局局長與南滿公司暨日本總領  
事商減嚴定限制聲明此項土地專限於鐵路及鐵路業務必要事項  
之使用不得用爲其他項之經營至火車站位置等當與我國官憲妥  
商決定如用地內欲設馬路時必須先行商請所在地方官得其許可  
後始得實行等因彼此議定各以公文作據在案現據南滿會社送到

商減車站用地數目表暨圖說各件經本司詳加覆核照原開數目已減過半調查沿路車站用地似屬無從再減應否准其照表開數目分別購買呈請鑒核並轉咨外郵兩部核示祇遵等情查安奉鐵路需用地畝迭經派員商減嚴定限制按照此次表開數目似屬無可再減究竟應否照表開數目分別購買相應鈔表備文咨行查核見覆等因前來正核辦間又准外務部咨同前因查此次表開等級畝數計乙種需用地積鳳凰城一處共九百一十一畝八步九釐鷄冠山一處共七百八十九畝三步一釐連山關一處共三百四十六畝九步六釐本溪湖一處共四百二十畝五步七釐丙種五龍背等五處每處二百四十三畝三步戊種沙河鎮等十二處每處一百二十一畝六分三釐此外更於

本溪湖車站加橋樑材料場一處共四十二畝二步四釐本部以該鐵路需用地畝未經收到原開數目無案可稽惟前據該督撫電開據安奉車站用地圖大概分甲乙丙丁戊五種安東奉天爲甲種鳳凰本溪連山鷄冠四處爲乙種其餘爲丙丁戊三種甲種地畝無定因奉天原有南滿車站安奉已購有極大地段乙種用地九百四十畝丙種二百七十餘畝丁種二百二十餘畝戊種百二十餘畝等語核與此次表開畝數不同究竟其原開地畝數目若干此次表開畝數是否大減且前電內稱安東已購極大地段其平方若干相應咨呈貴部有無收到此項原開地畝數目如有原案請將前項各節檢鈔原開數目聲覆過部以憑核辦俟核辦後再行知照可也須至咨呈者

十一月二十八日安奉鐵路檔

學部奏擬准外國學生入經科肄業並酌定簡章片

學部片 再查各國大學除教授本國學生外外國人有程度相合而願入學肄業者亦無不一體收取誠以學問之道靡有窮盡惟互相師法而後討論益精自臣部籌設分科大學以來屢有外國人前來詢問能否准其入學肄業臣等竊維近日中國學生游學東西各國者甚多今中國設立大學而彼國亦願來學以往來施報言固所以厚邦交以知識交換言亦所以廣教育臣等公同斟酌經學一科爲中國所獨有擬先就經科大學准外國人入學預由臣部酌定簡章以期妥洽至其餘各科大學設立之初恐難遽及東西各國之完備外國人入學一節擬暫從緩議謹附片具陳是否有當伏乞聖鑒訓示謹奏宣統元年十

一月二十九日奉旨依議欽此外人游學檔

魯撫孫寶琦咨外部與德商簽訂收回五鑛合同請查

核文

附合同

爲咨呈事案查光緒二十三年七月間楊前院與德商採鑛公司議定合同八條當經奏明並分咨鈞部暨軍機處農工商部查照各在案查該公司原指之沂州沂水諸城濰縣四處查勘早已停工近年但在第五處鑛界內寧海州屬之茅山查勘金鑛上年夏秋間東省士民倡立保鑛會該公司遂有轉售茅山之議本年三月及五月德領事貝斯兩次照會袁前院稱奉本國外部命令以茅山鑛產售與中國爲請索價德幣二百二十五萬馬克並聲言此外四處一併歸還袁前院以合同

既有准其轉售明文因集官紳會議主收回者居其多數一面派員勘估茅山鑛產及歷年所費工本據稟稱約用過銀四十二萬餘兩而所議籌款辦法迄無眉目六月間本部院蒞東復准德領事照請速將此案辦結隨派勸業道蕭應椿等與該德商石謐德開議該公司原索價二百二十五萬馬克合銀八十餘萬兩迭次磋磨議減該公司讓至三十四萬兩堅持不肯再讓體察情形只可照此議結因另訂條款聲明原訂合同作廢茅山鑛產及五處房地器具一概歸還中國償給歷年費用銀三十四萬兩分四年付清迭經函電商蒙鈞部照允擬於十一月十九日飭該道等與石謐德公司簽押該公司鑛權遂從此一律收回再本年三月間該公司按照合同在探鑛兩年限內呈請開辦茅山



金鑛三塊七月間經鈞部與農工商部核准填發執照三紙來東本部院因正議收回恐其藉端要挾故未發給今概由東省購回原發鑛照自應繳銷據該道等詳請分別奏咨前來本部院覆核無異已將簽訂條款敬謹照繕進呈御覽除另文咨鈔奏稿暨將茅山鑛照咨送農工商部查銷外合將照繕條款備文咨呈鈞部謹請查核備案施行 十一

月二十九日鑛務檔

### 山東收回德商五鑛合同

爲訂立條款事案照華德採鑛公司現與山東官府商訂退還鑛權條款如下

第一款 華德採鑛公司願將本年三月在採鑛二年期限以內呈請

領照開辦之寧海州茅山鑛地三塊退還不再開辦聽憑中國官府另行招商接辦永遠不得過問

第二款 所有光緒三十三年七月十四日所訂華德採鑛公司合同聲明一律作廢自此件畫押之日公司即將前項合同交還山東官府

第三款 公司從前在山東五處勘鑛工本及繪圖買地房屋器具一切費用現經彼此商允付給公司庫平銀三十四萬兩分爲四年交清每年勻作二期第一期自西歷一千九百十年正月及七月起每期交庫平銀四萬二千五百兩於西歷每年正月及七月以內照數兌交（重議定於西歷正月七月二十五號交）

第四款 此項銀兩應由接辦各鑛之新商承認惟現在驟難招定有人是以由山東撫院擔保先行設法挪墊每期交由濟南或青島德華銀行照收（重議定在青島德華銀行交）

第五款 自此件畫押之後公司即將下開各件交還山東官府

甲 公司勘鑛所繪詳細鑛圖以及勘鑛各項器具

乙 公司在五處鑛地內置買地畝房屋器具

丙 公司價買之地畝房屋印契或白契

丁 地畝房屋器具開列清單以憑點交接收

第六款 此項合同簽字後應請山東巡撫部院孫 奏明立案

第七款 至第八期款項付清後公司即將此項條款交與山東官府

註銷 以上七款蒙山東撫院孫 批准並咨請外務部農工商部

允准施行以華文爲主共繕兩分彼此簽押各執一分作據

大清國山東巡撫部院孫寶琦簽押大清國總辦山東洋務局即補道  
劉大清國山東勸業道蕭大德國總辦山東華德採礦公司石訂立  
大清國宣統元年十一月十九日

外部致度郵兩部美外部謂保全中國東省鐵路主權

須先贖回錦瓊路希詳覆函

逕密啟者東三省籌借外款修築鐵路一事前於本年十月十二日由  
本部會同貴部妥議覆奏咨行該督撫通盤籌畫果能確有把握應需  
借款仍隨時咨商三部妥籌辦理等因嗣於十一月十一日經該督撫

遵照部議覆奏奉硃批該部議奏欽此正擬核辦間先後接准美國費  
署使節略暨照會以美國政府顧全中國東三省主權並保守利益均  
霑開放門戶主義擬將中日俄所造之鐵路准各國得一體承購股票  
認明中國爲地主此事若果開辦須先請中日俄三國允准襄助英美  
兩國固有錦瓊鐵路合同亦須幫同辦理若此則滿洲土地之權與鐵  
路界內之交涉均可由此而定不致再生障礙等語當於會晤時告以  
中國對於此項辦法宗旨實已同意惟此事關繫重大將來商議詳細  
節目時仍須審度所擬與中國主權有無妨礙且事關中國路政財政  
尙須與度支郵傳兩部會商如果有礙主權或爲財力所限即當作爲  
罷論費答以即當電請政府向各國提議至詳細辦法將來應隨時與

中國及各國逐節商議等情本部以此事關繫東省全局所議若成則錦瓊一路自可併案辦理故議覆東督一摺暫未咨商貴部現接駐美張大臣電稱美外部宣言實行保全中國東三省主權同享通商利益須將東省鐵路一概贖回交還中國款由各國合借中國未還款以前管路購料利益各國分沾滿洲鐵路日俄獨任何如各國分任以保和平已通行各國等語嗣接准美費使照稱西十月間所訂錦瓊鐵路借款建築草合同美政府重視此事以爲於將來統併鐵路之辦法有最切要之關繫若錦瓊之局旣成則按此約可令該公司出頭集各國之資而築各處之路將來歸併之大局亦視乎錦瓊一路而爲之基礎中國政府於該路如承允諾美政府自樂聞命云云嗣又面交美政府來



電稱贖回滿洲各鐵路一事於中國關係甚大此議之成全視中國早日將錦環草合同批准宣佈各等語本部以東省情形日急非統籌全局不足以資補救籌築錦環一路爲目下至爲切要之圖果能妥改合同似不能不准其續與定議美國倡議聯合各國共辦東省鐵路此事果底於成不特中國行政權不致再有障礙且各國利益既平則日俄固無從爭雄英美亦不致壟斷以現在東省情形而論計亦無有逾於此者惟茲事體大中國固不便提議於各國即美與各國磋商亦非旦夕所可成或因他國不能同意致此事竟成畫餅亦難逆料而我國對於東三省之辦法當立於主動地位不當立被動地位一切措施應先自定方針以圖進取本部亦知錦環即成未必足以鞏固國防希圖厚

利惟東省情事與內地不同內地借款造路祇爲商務利益起見東省則重在利用各國之勢力互相牽制以期保我主權尤必直達瓊瑋庶三省可以聯貫氣勢可期雄厚果如美政府所云得此憑藉可以仗義執言益資我助於大局裨益實非淺鮮至籌還本息歸償餘利原奏既稱不至無著自當責成該督撫悉心籌辦不至徒託空言現擬先將東省督撫一摺從速議覆除函致度支部郵傳部外貴部蓋慮周密務希詳細函覆以便擬稿會同具奏無任殷盼

十二月初二日 錦瓊鐵路檔

外部致陸徵祥和使遇有照會必加駁拒希告和外部

電

貝使抵任後本部極爲優待迺本年七月據農工商部咨安班瀾華僑

被虐照請轉達政府查辦彼竟照覆以此事不應照會語多無理經本部派員面商將照會收回上月諫議里華生被拘事本部以上海商會所稟案情無從查悉照請詢查彼覆稱與商會無涉不必過問閑事經部駁覆又稱應由受罰之人按照開化國律例層層上控彼不能干涉查兩國和好各派駐使原爲商辦交涉聯絡邦交詎和使遇有照會必加駁拒是否不諳使例抑因和屬實係虐待華僑藉爲諱飾似此殊失通使聯情之義希詳告外部詢明何事該使方能干涉電覆外十二月初

二日華僑檔

外部咨郵部安奉路需用地畝本部並無原開數目文爲咨覆事安奉鐵路各車站需用地畝一事接准來咨以此次表開等

級畝數與該督撫前電所開畝數不同咨請查照有無收到此項原開地畝數目原案檢鈔聲覆以憑核辦等因前來查本部並無收到此項原開地畝數目原案無憑鈔送相應咨覆貴部查照可也

十二月初二日  
安奉鐵路檔

直督陳夔龍致外部承函以贖軍糧城爲宗旨藉結滇

### 案當遵辦電

初五日電敬悉前承函以贖軍糧城爲實佔地兵房爲名藉結滇案兩害從輕誠如尊論事請大部主持由敝處勉籌俟鈞署奏明奉到咨行遵即照辦餘詳函龍魚十二月初六日河口檔

使和陸徵祥覆外部來電告和外部彼責貝使不合電

初二日電遵告外務部彼於收回照會事頗注意又於不必過問閑事

之句明責貝使不合至不能干涉一層則略代解釋而請寬期詳究再覆並稱諫義里事已請拓部飭屬公平詳查云和會加入五約今已備文送交祥初五日十二月初六日華僑檔

### 外部奏擬設巴那瑪總領事各官員缺揀員派充摺

外務部奏爲擬設駐紮巴那瑪總領事各官員缺揀員派充恭摺仰祈聖鑒事竊查中美洲巴那瑪舊隸哥比倫亞國管轄近年離哥獨立美國首認保護借美款開巴那瑪運河以通太平洋航路西歐諸國皆將改道於此工商麇集實爲南北美轉運之要衝英法各國均設有領事華僑在該埠貿易約三千餘人商多工少營業頗稱發達祇以未設領事官時有被虐情事光緒三十三年八月巴那瑪外部大臣照會臣部

議派木來諾司充中國總領事駐紮香港辦事經臣部發給認准文憑照章接待並聲明嗣後中國如派員前往巴那瑪亦應一體待遇以爲他日設領之左券上年九月巴那瑪新任總統即位其外部大臣託駐美使臣伍廷芳寄遞國書經臣部請旨答覆如禮本年六月間該埠華僑電稱被虐苦况兩廣總督張人駿咨商臣部議籌設領事或別籌保護辦法當經電知伍廷芳就近調查旋准函覆到巴後謁見巴總統極承優待因述保護華僑欲設領事之意彼頗首肯現在美巴條約尙未妥訂我可先行設領徐商訂約以期簡捷免將來華僑爲美國苛例所牽制等語似此情形亟應設立巴那瑪總領事由臣部揀派熟悉外情人員前往駐紮以資保衛所有一切開辦常年經費俸薪章程均照坎



拿大斐利濱新設總領事辦法添設二等通譯官一員二等三等書記官各一員以資辦公而符成案茲查有溫哥華正領事江蘇候補道歐陽庚堪以陞署駐巴那瑪總領事官其二等通譯官請以溫哥華領署二等通譯官留學美國畢業生歐陽琛調署二等書記官請以溫哥華領署二等書記官廣東候補從九品章清鑑調署三等書記官請以候選通判繆蔚植試署以上各員均請仍留原官原銜先行試署果能得力再行照章查核奏請實授如蒙俞允即由臣部刊刻關防劄飭該員等遵照並咨行出使美墨秘古國大臣照會巴那瑪外部大臣轉飭接待所有揀員派充巴那瑪總領事各官緣由理合恭摺具陳伏乞皇上聖鑒訓示謹奏宣統元年十二月初六日奉硃批依議欽此設領檔

郵部致外部錦瓊鐵路借款擬先定大綱再商合同函

敬密啟者接准本月初二日鈞函祇悉一是東省借款築路原係政治  
關繫非爲營業起見現美費署使提議各路統一策洵是排難解紛  
之法所稱歸併大局須視錦瓊爲基礎亦係準情度勢扼要之言其中  
委曲繁難經大部逐層摘發盡慮周詳至爲欽佩現在機局如此允宜  
先將錦瓊借款築路事宜從速議覆惟草合同第六款所載該路公司  
應由中英美三國人聯絡而成等語係屬三國合辦非由中國借款自  
辦將來易生窒礙此爲本原之病其用人購料等事有未盡合宜之處  
係屬枝葉之病詳細磋商恐費時日倘能聲明先定借款築路大綱合  
同隨後商改自應早日擬稿會同入奏至將來統一之議有成則此路

或須斟酌改線接線免與南滿京奉利益或有不能融貫之處想美人必能體會此意倫統一之計不能遽成則此路尤爲當務之急亟應從早定議至籌還本息責在督撫誠如尊論不徒託空言若如該督撫原片所稱創立銀行以興實業萬一路利不敷還本似亦可將興辦實業所得之餘利以還路本如此辦法更有把握應請大部主稿與度支部等商酌見示定期會奏愚昧之見統乞鈞裁專此密覆敬請鑒察 十二

月初六日錦環鐵路檔

署粵督袁樹勳致外部越督擬改對汎侯會商後籌辦

電

申初五日兩電均悉報館謠傳越邊之事經勳迭飭嚴禁並飭報紙更

正現既法使仍以爲言自應再飭巡警道及欽廉邊道出示切實曉諭  
隨時查禁以杜煽感而免藉口至越督擬改對汛章程一事前奉大部  
電咨令由滇粵桂三省會商妥籌經分咨滇桂及行知邊道體察情形  
會商滇桂邊防各員合籌辦理昨據廉欽郭道具覆粵邊情形與越督  
現擬改辦之章程尙無大礙等語惟沿邊數千里粵轄之境最少其滇  
桂邊境能否一律照辦擬再會商後籌定劃一辦法以免參差謹先電  
陳樹勳陽十二月初八日中越檔

錫良程德全致外部安奉路所需地畝俟繪就圖說再

呈電

安奉鐵路需用地畝前蒙郵傳部派員來奉會勘路線曾於八月間將

日人原開沿路用地分甲乙丙丁戊五種數日電陳在案嗣飭交涉司  
屢與日領事商減用地堅持日久未能解決十一月中旬始將車站各  
項用地大致商議就緒當因用地圖說核繪未成先將表開數目分咨  
查核現正迭飭交涉司將此項圖說趕速繪畫約計一旬內當可告竣  
因案情複雜若不披閱圖說萬難明白尤非電文所能詳述容俟此項  
圖說繪就後再行咨呈鈞部核辦其安東車站日本在軍政時代已購  
佔六道溝極大之地應同撤換沿路兵警問題併案交涉查本年四月  
間咨請鈞部與日使交涉必邀蓋籌此間亦屢向日領催議均以未得  
彼國政府訓令爲詞昨准郵部電詢除覆外謹將辦理情形先行電陳

統俟鑒察良全陽十二月初八日安奉鐵路檔

度支部等會奏遵議密籌延吉善後事宜摺

度支部外務部軍諮處陸軍部等奏爲遵旨議奏恭摺會陳仰祈聖鑒  
事軍機處鈔交東三省總督錫良奏密籌延吉善後事宜一摺宣統元  
年十一月十一日奉硃批該衙門妥議具奏欽此欽遵到部據原奏內  
稱吉林之延吉廳自光緒三十三年前督臣徐世昌奏請特派專員督  
辦吉林邊務其時日人藉口界務未定地方官應辦諸事措置爲難故  
邊務處之設不獨兵隊歸其管轄即地方一切裁判巡警學堂亦無不  
統屬於邊務現在延吉界務業已解決日人原設憲兵分遣所亦經裁  
撤開辦商埠大致亦已就緒亟應設官建治因時制宜查督辦邊務本  
係軍事性質以後自當劃分權限除軍政國防仍由該督辦吳祿貞隨



時商辦外凡地方一切行政及外交事件應即專歸地方官主持管理惟日人特設總領事體制較崇我自應有高級之地方官與之對峙擬即將駐琿春之東南路兵備道移駐延吉或半年駐琿半年駐延以期兼顧臣昭常昨抵延吉晤商督辦邊務吳祿貞並與臣錫良一再電商意見均各相同自應奏明辦理惟臣等所至爲籌邊慮者延吉全境南臨朝鮮東控海參崴爲吉林南部重要地域日俄兩國一旦有事亦爲形勢之所必爭此次日本要約開埠四處均佔延境形勝無非爲軍事上計畫且名雖開放交通未便西人裹足實與日人租界地無異現在駐延日總領事甫到擅帶警兵多名即有違約舉動且查俄人於東海濱省一帶有陸軍十餘萬日於朝鮮亦駐兵數萬人我則由延至琿分

段駐紮僅有陸軍一標臣錫良前在京時曾奏請調撥陸軍兩協前往延吉比到任後查明除調東客軍不計外奉省僅有陸軍兩標吉省僅有陸軍一協均係駐紮要地不能抽調江省則並無陸軍夫吉江兩省東自臨江州以至琿春南自長白山以至圖們江口綿長三千餘里處處與俄韓邊境相連今既勢逼處此不得已先其所急則延琿一帶至少非練有陸軍一鎮不足以言備邊查吉林邊務經費部撥與吉省籌撥各三十萬兩支應一切本不寬餘吉省財力拮据驟然出款三十萬金實已筋疲力盡自開放商埠後預計添設各級審判檢察各廳每年已需經費十三四萬兩此外如增設官署推廣巡警學堂籌辦實業在在均須補助來年督辦邊務經費極力騰挪只能勉撥銀十餘萬兩通

盤籌畫必須由部常年籌撥銀一百萬兩內外協濟方可編練陸軍一鎮應懇天恩俯念根本重地飭部會議籌撥仍令吳祿貞督辦邊務專管延輝全境軍政防務事宜必於邊局大有裨益倘部臣籌款爲難未允撥給則軍事無由展布督辦邊務一差暫予裁撤仍俟籌有鉅款再行擴張規畫等語臣等伏查該督所奏自係爲保守和平慎重邊防起見惟近來要政繁興百端並舉來源日涸用款方殷內外同一竭蹶本年三月因延吉邊務重要經前督臣徐世昌續請指撥的款並聲明先籌辦一年俟界務解決一併辦理經臣部議覆請飭新任督臣錫良到任後體察情形核明具奏再由臣部籌擬嗣由該督臣查明具奏臣部核與原奏數目相符准照分籌數目由部指撥銀三十萬兩已屬勉爲

籌撥現在部庫奇窘各省於認籌之款奏請改撥者紛至沓來實無從再籌此大宗的款以資協濟所請於延輝一帶編練陸軍一鎮常年由部籌撥銀一百萬兩實屬無從籌措既據該督奏稱根本重地邊防緊要仍令吳祿貞督辦邊務事宜專管延輝全境軍政防務事宜必於邊局大有裨益等語是該地防務重要亦係實情應請飭下該督妥籌善法務於邊務財政兩不相妨以仰副朝廷慎重邊務之至意所有遵議緣由謹合詞會陳伏乞皇上聖鑒再此摺係度支部主稿會同外務部軍諮處陸軍部辦理合併聲明謹奏宣統元年十二月初九日奉旨依

議欽此 延吉邊務檔

澳門勘界大臣高而謙咨外部差事已畢呈繳關防文

爲咨呈事竊照本大臣於宣統元年正月二十一日欽奉諭旨派辦澳門勘界事宜遵即由滇逕赴廣東差次當經兩廣總督部堂咨送大部電准由粵刊刻關防一顆備用前來現在回京覆命差事已畢應將前領關防呈繳大部再此次與葡使馬沙鐸會議九次所有華洋文議案說帖除由粵鈔稿陸續咨呈大部備案外茲合將彼此簽押並蓋用關防之原文彙呈大部存檔再本大臣在粵搜集澳門地圖七幅合併附呈以備參考相應備文咨呈爲此合咨大部謹請察收存檔施行須至咨呈者（計呈關防一顆華法文議案各九份葡使法文說帖十分地

圖七幅）十二月初十日澳門檔

濱江關道施肇基稟外部譯呈俄員所擬稅鈔節略並

哈爾濱等關試辦章程函

附節略一件章程三件

敬稟者竊職道遵飭會同稅務司葛諾發與俄員會議松花江貿易試辦章程一案業將迭議情形並照議俄員所開總綱節略先後電稟在案十一月二十二日與俄員第四次會議當將第七條彼此議允其中字句與原訂章程略有改易而意義尙無甚出入第八條內由內地委員局卡查驗一層俄員不肯承認堅請刪除職道等一再辯拒申明此係各關普通辦法且以稽查運載違禁貨物關繫主權萬難更改相持許久迄未定議連日俄員因彼節期停止辦公現訂十二月初八日接議並據俄員將全章節略續送前來職道等詳加譯閱所有船鈔一項彼竟未經開列顯係意存反對茲將譯文二份另摺繕呈憲鑒伏乞隨

時訓示俾有遵循除分稟外肅稟十二月初十日稅務檔

譯錄俄員所擬稅鈔節略

第一條 以上各關只收關稅其內地以及他項稅捐概不徵收其子稅亦由各該關徵收

第二條 進出口稅餉按照光緒二十八年即西歷一千九百零二年改訂之通商進口稅則並咸豐八年即西歷一千八百五十八年所訂之通商進出口稅則暨光緒七年即西歷一千八百八十一年聖彼得堡中俄改訂條約並此約續訂中俄陸路通商章程以及同治元年即西歷一千八百六十二年俄國續增稅則徵收凡洋貨應完入內地子稅均按照以上條款所定稅數折半徵收稅則未載之



貨無論進出口均按估價值百抽五徵收（只洋貨應完子稅）

第三條 後開各貨均按照光緒七年即西歷一千八百八十一年聖彼得堡中俄改訂條約續訂中俄陸路通商章程第十四條所載一概免稅如金銀外國各銀錢各種麵砂穀米麪餅熟肉熟菜牛奶酥牛油蜜餞外國衣服金銀首飾攪銀器香水胰碱炭柴薪外國蠟燭外國煙絲煙葉外國酒家用雜物船用雜物行李紙張筆墨毡毯鐵刀利器外國自用藥料玻璃器皿

除以上所載凡外國運來之米以及各雜色糧並印字書籍水陸各圖新聞紙等一併在列

第四條 俄國口岸運來之貨

俄國口岸運來之貨擬運百里（卽五十俄里）免稅界外地方應按照光緒七年卽西歷一千八百八十一年中俄改訂條約並此約續訂章程暨同治元年卽西歷一千八百六十二年俄國續增稅則徵收稅餉若運入百里（卽五十俄里）界內應按照光緒七年卽西歷一千八百八十一年續定陸路通商章程第一條概不徵收稅餉凡應完之入內地子稅其免稅貨物均按照續訂陸路通商章程第十四條每估值百兩抽稅二五其應稅貨物均按照光緒七年卽西歷一千八百八十一年中俄改訂條約並同治元年卽西歷一千八百六十二年俄國續增稅則所載稅數增收

第五條 土貨

甲 凡土貨由內地各處起運者即照下開之辦法辦理

一凡由內地各處運抵商埠途中未經過他處商埠者應納關稅其數與出口正稅之數相抵（此項正稅按現行出口稅則折半徵收）

二凡由內地各處運抵商埠途中經過商埠或一處數處者須在首先經過之商埠完一出口正稅

三凡運往俄國口岸者如擬運百里（即五十俄里）免稅界外應完出口正稅其由哈爾濱三姓中間內地各處起運者在三姓完納稅銀其由三姓拉哈蘇蘇中間各處內地起運者在拉哈蘇蘇宗納稅銀

凡土貨由商埠起運者即照下開之辦法辦理

一凡由商埠運往內地各處途中未經過他商埠者須在起運之埠完納出口正稅（此項出口正稅暫按現行出口稅則折半徵收）

二凡由商埠運往內地各處途中經過商埠或一處數處者須在起運之埠完納出口正稅

四凡由商埠運往俄國口岸者如擬運百里（即五十俄里）免稅界外者若非按照光緒七年即西歷一千八百八十一年續訂陸路通商章程內載免稅之貨即在起運之商埠完納出口正稅

第六條 凡徵收各項稅鈔即發給相當照據爲憑至貨物由此商埠運往彼商埠如未持有此項照據者一經查出罰充入官

第七條 進出口貨稅辦法即進口貨稅在未經離關以前交納出

口貨稅在尙未下船以前交納

第八條 凡貨物由沿江處所直運至東清鐵路綏芬河滿洲里兩車站之外地方卽在綏滿兩站完稅並按照該二處華關試辦章程辦理

第九條 凡貨物由沿江處所運至華關或鐵路公司所管之棧房寄存並擬轉運至滿洲里及綏芬河兩車站之外地方如從前在松花江裝船地方或沿途經過地方未經完納出口稅銀者方須完納出口稅也

第十條 凡貨物寄存東清鐵路所管轄及經理之棧房如未進棧房之前所有稅銀業經完清該貨物復行轉運至滿綏兩站之外地

方出口稅自應按照滿綏兩關稅則計算至以前已完之銀多過於滿綏兩關稅則者即當發還

第十一條 凡五穀及他項貨物分散裝運者俟滿綏兩關查明出口實數與由松花江運到之數相符即按照本章第八九十等款辦理證明由江運至車站或至棧房之貨即係原來貨物鐵路公司在運單上加蓋特別戳記

第十二條 復出口貨及領有內地子稅等單之貨均准運至擬往之處無阻如貨物復行出口即將原完稅銀發還

第十三條 即試辦章程第九條

第十四條 凡呈遞艙口單如查有舛錯呈遞之人應罰銀船內如

查有艙口單未開列之貨或違禁之貨均照通商條約辦理或偶有事件並可按照中國各通商口岸辦法凡艙口單內開列之貨未經運到者應如數完稅

擬訂哈爾濱江關暫行試辦章程

甲 凡船隻進哈爾濱口時須將開列裝載各貨之艙口單及三姓分關拉哈蘇蘇分卡所給函封照據一并呈遞此外另開清單一紙將沿途停泊各處所暨在彼搭客裝貨來哈爾濱者分別報明

乙 凡船隻欲領准單出口須先呈遞艙口單將該船所載貨物及下貨單號數貨物之標識件數貨色等一一詳細載明指往之處每處各具一單由關將該單與關發之各項照據核對如果相符即准



該船開行

丙 凡貨物完稅後運往商埠由關發給總單並完稅憑照用函封固交與船戶或執事人收執俟抵指運之埠時赴關呈遞

丁 凡貨物完稅後欲運往內地處所者由關發給收稅條交與貨主作爲已完關稅之據

戊 若有經過貨物由江面船內起入火車時可由關酌派關員前往傅家甸松花江對岸過載碼頭查驗

己 哈爾濱關辦法須按照現行之條約並東清鐵路公司合同施行爲根據

庚 東清鐵路界限內之江岸雖非通商口岸若船隻在彼處停泊

亦須按照以上各章程一律辦理

辛 江關在東清鐵路界限內之江岸於開辦之初江關應與鐵路公司另行商訂特別專條

擬訂三姓分關暫行試辦章程

凡由黑龍江開來之船欲往上游者到三姓時須將拉哈蘇蘇用函封固發給之艙口單赴關呈遞若該船在哈拉蘇蘇三姓中間沿途某地方曾經停泊又須將在該處搭客裝貨等事來三姓或三姓以上各處者另開清單呈遞

凡船將開往上游者由關將原載之貨及在三姓添載之貨各艙口單用函封固交與船主到哈爾濱江關呈遞

凡由哈爾濱開來之船欲往下游者到三姓時須將該船總單等件及裝載之貨各艙口單呈驗指往之處每處各具清單一紙將沿途停泊內地各處所暨在彼搭客裝貨來三姓或三姓以下各處者分別報明

凡船將開行往下游者須將原載之貨及在三姓以上添載之處分別列入艙口單呈遞由關將該單與關發之各項照據核對如果相符卽准該船從三姓開行

擬訂拉哈蘇蘇暫行試辦章程

凡由黑龍江開來之船欲往上游者到拉哈蘇蘇時須將該船艙口單兩份呈驗該船所載貨物暨標識件數等事均須於單內一一註

明並起運之處指往之處每處各具一單由本卡將艙口單與貨物核對後一份存於本卡一份由本卡簽名蓋印用函封固交與船主到經過之第一關呈遞如有事故卽由本卡於此單內註明

凡船隻欲出口往黑龍江者須停輪候驗呈遞艙口單將所載之貨及客位數目等事一一於單內註明否則卽將該船議罰

### 外度郵三部會奏議覆借英美款興築錦瓊鐵路摺

外務部度支部郵傳部等奏爲遵旨議覆恭摺會陳仰祈聖鑒事宣統元年十一月十一日准軍機處鈔交東三省總督錫良奉天巡撫程德全奏籌借外款遵照部議妥籌辦法等摺奉硃批該部議奏片二件併發欽此原奏內稱築路之舉他省志在興利固當謀出萬全東省則所

爭者只在早築一日軌躅交通國防鞏固此路直接京奉幹線旁達葫蘆島不凍海口內通蒙古要隘外捍黑龍江邊陲形勢極便百貨更易流通斷不至於無利可獲臣等遵照部議通盤籌畫惟有築路興業二者兼營併進築路合同或由三部與之直接另議或即仍交臣等查照前次所訂除部臣所指爲侵損利權各條再與該代表悉心磋商其餘不必作廢免致坐誤事機又另片密陳略謂東省生路祇此錦瓊一條東省生機祇有均權一法美國以滿洲商務欲均利益該國商人允以鉅款貸我又聯英入股以杜牽制遂合爲英美公司共貸此款各等語臣等查東三省自日俄戰後各以鐵路分據要害擴張區域侵越主權此時亟圖對待之方誠非另闢一路隱相抵制不足以扶危局而固國

防前次臣等於會議覆陳摺內聲明鐵路與實業必須兼營併進所指各節通盤審計果能確有把握應需借款仍隨時咨商部臣妥籌辦理亦以路必須修款必須借惟謀定後動必預有成算而始可措置適宜前該督撫以興辦實業在先營鐵路有鐵路爲運輸將來籌還本息即以森林煤礦墾牧之餘利歸償當不致無著是該省建修此路其借款本息仍由該省自行籌還所陳各節均中肯要自不應置爲緩圖應即准如所請仍由該督撫與美國銀公司代表接續商議借款修路辦法原立合同多有損失權利之處應由該督撫仿照各省借款修路之最善辦法取益防損悉心改訂先行分咨臣部核定後再爲簽押以資接洽而昭慎重至另片稱組織銀行應與鐵路離而爲二或另立興辦實

業借款合同或另向他國銀行借款一節自是劃分次第辦法度支部查振興實業自當以銀行爲樞紐現在大清銀行於奉天長春等處設立分行正擬極力推廣爲全國貨財流通之地惟實業之興當在道路交通以後此次借款修路該還本息擔負業已不輕恐無餘力再借外資別營實業至殖邊銀行臣部奏定章程本准商民集資開設儘可由該督撫等一面設法招徠以資興辦屆時大清銀行亦當竭力維持所請另立興辦實業合同或向他國銀行借款之處應從緩議如蒙俞允恭候命下即由臣等咨行東三省總督等遵照辦理所有議覆緣由是  
否有當理合恭摺會陳伏乞皇上聖鑒訓示再此摺係外務部主稿會同度支部郵傳部具奏合併陳明謹奏宣統元年十二月初十日具奏



奉硃批依議欽此 錦瓊鐵路檔

### 西藏公會呈外部請將聯大臣及兵隊撤回查辦電

現接駐藏大臣來文內開藏民電稟各節鈞部示覆如下據聯大臣報告乃遵朝廷意旨辦事妥協從無殘燬寺院殺傷人民等事華兵行止藏民勿得畏懼所謂公會者乃三四人之私見煽惑人心妄讒駐藏大臣停止供應擅請撤兵須知駐兵係爲防護商埠於教務關繫至重爾等應當依託中國朝廷遵從駐藏大臣命令倘若藐視不遵則亦無法以使爾等安居樂業等因查西藏去年電請撤回聯大臣一節乃電中要旨鈞電未經提及恐此次來文亦係聯大臣等捏報情形料鈞部尙未酌覆也前電各節實係公會所稟並非如上文所云僅三四人之私

見聯大臣於西藏向未扶助惟有虐待藏民且與趙軍商燬寺院甚多  
殺傷喇嘛甚衆擾亂教務本會代表如蒙傳令到京事實當可質證惟  
未經了結以前聯大臣等及兵隊應即撤回查辦則事之眞僞自能水  
落石出如蒙賜覆請勿由駐藏大臣轉交恐其扣留或另改字樣致與  
藏事無濟懇乞示覆爲盼西藏總會謹稟十二月十二日西藏檔

### 外部咨張蔭棠答覆南美巴利維亞國國書希轉遞文

爲咨行事本部接准巴利維亞國外部大臣白斯脫孟德照會附送其  
新總統登位國書請代呈遞現經代爲進呈欽奉答覆國書一道相應  
恭寄貴大臣祇領並本部照會一件設法郵寄南美洲巴利維亞國外  
部可也十二月十五日出使美國檔

外部致李經羲河內設領一層法人並無異議電

初九日電悉本部於本月初十查明滇路損失由北洋撥款二十萬兩以收回軍糧城兵房爲名不作賠償路款並聲明案結後即議定河內設領事宜奉旨允准當經鈔咨現照准法使覆稱河內設領甚願速即商定不再拖延是設領一層法人並無異議至路巡事本載滇越路章第二十六條既由尊處飭員與議當可照章議定如公司始終作難再電由本部核商法使希查照外十二月十五日河口檔

滇督李經羲致外部邊界警察事關三省謹陳辦法電

邊界警察事關三省應各按就地情形核議法使訂章與會巡章大致相同或量加裁定照行無礙查兩國邊界辦事各有權責可隨時照章

知會不必定爲合辦滇汛共八處與原設相符不誤巧酒無此地名對  
普邦者爲董幹尙有不能設者一爲滇猛崗該處地多苗蠻性野俗悍  
最易滋事現惟嚴禁過界應規復者二龍膊對龍膊新店對猛康越龍  
膊已移猛康已撤滇界仍設須循舊章應添設者二滇田房對越者蘭  
滇駕鞍底巒越婁寨均屬要道經過邊界辦法第十二至十六條無甚  
出入龔道擬有簡章十七則並護照通行長行准單各式精當可用附  
咨候核二十一二條較會巡章有漏義如捕獲查問重辦按律罰辦等  
字均關緊要亟應補入逃兵過界照匪徒拿交擬附列二十一條之末  
餘僅字句增減並陳明理由二十四條後由粵主辦咨趕繕卽發備載  
詳情謹先就應提議者電陳以備答問仍乞俟文到併核經義叩鹽宣

統元年十二月十五日發十七日奉電旨李經羲電奏悉所陳整頓對  
汛情形著外務部知道欽此河口檔

外部覆美使費錦瓊鐵路借款合同應由東督與美英  
公司妥商改訂照會

爲照覆事接准來照以本部議准東督等奏請籌借外款分次建築錦  
瓊鐵路一摺會奏摺件尙未得看視茲據本國政府意見所奉硃批定  
指前立之草合同而言該草合同係一千九百零九年十月二號東督  
奉撫與美公司及英商保齡商訂建築錦州至瓊揮之鐵路合同此項  
草合同內有一條係酌訂彼此兩益之細合同如以本國政府意見不  
差即請照覆以便囑令美公司代表屆時與東督奉撫訂立詳細合同

因查本年十二月初十日日本部會奏摺件所奉硃批確係指東督奉撫與美公司及英商保齡所訂分次建築錦州至瓊瑋鐵路合同而言惟此項草合同內尙有未妥應行改訂之處應仍由東督等與美國銀公司代表詳細妥爲商訂相應照覆貴署大臣查照轉達貴國政府並飭美公司代表遵照可也須至照覆者十二月十七日錦瓊鐵路檔

### 專使唐紹儀奏報考察各國財政情形摺

考察各國財政專使唐紹儀奏爲恭報微臣考察各國財政情形恭摺具陳仰祈聖鑒事竊臣於光緒三十四年七月奉命前往日本及歐洲諸大國考察財政歷將馳抵各國並起程日期先後電奏在案竊以財政一事其組織之機關與推行之進步必須將國勢之經權常變與物

力之消長盈虛審度事機因時進退舉凡開源節流補偏救弊有非輕心從事即可措施咸宜者各國財政定爲專家之學爲終身所不能盡蓋其造端大而呈效難也臣才識疏庸謬膺考察此次周歷日本及英法德俄義奧比八國或二十餘日或十餘日不等往返計九閱月有奇所有各國財政沿革互異時勢各殊事變則日出不窮法令則隨時遞改紛繁複雜莫由枚舉惟有將各國財政現在情形與經營之要點擇要分別臚列用備參考之助謹爲我皇上陳之臣於上年九月行抵日本會晤首相兼度支部大臣導觀銀行及造幣機廠詳細觀察布置井然雖規模不及歐洲而日求發達之心則有加而無已並出示賦稅則例統計表冊等件類皆編纂成書流播海內而於該國之實在內容未



能詳盡經與各該大臣一再晤談藉論該國近來財政殊爲支絀綜計歲出歲入之數尙不敷日幣二千萬元目下開源不易節流亦難所可籌款者稅項而已現提議修改稅則以爲補救之計預算改定後每年入款可增加三千餘萬元將來出入兩抵尙盈餘一千餘萬元一俟決議當即舉行此舉爲該國最近切要之圖又擬增加酒稅此項爲入款之一宗亦未定議此日本財政之情形也本年正月行抵英國查英爲立憲最先之國國家財政繫於議院凡爲政府力所不逮者議院得而輔助之近年以來籌辦軍政殖民事項用款日繁歲入之數不敷支應而不敷之款隨時由議院設法籌補蓋國民樂於輸將國家不憂匱乏此上下休戚相關之效故非各國所能並駕也並觀國家銀行勢力雄

厚幾欲統各國銀行胥入範圍之內銀行者全國之府庫也公家所入與民間所積之數皆於銀行儲之至全國之資財聚於銀行凡利於國家利於國民者銀行皆從而利之純從遠大著想不與小民爭利其全國之利賴銀行銀行之維繫全國幾有固結而莫解者至於徵稅宗旨皆從來源入手亦其國人性質使然意謂來源日濬稅項日增若銷場稅過度稅皆處於來源之後而皆可寬免者也其最著者則有遺產稅每年約得金三千二百餘萬鎊營業稅每年亦得金三千三百九十餘萬鎊又有進口稅以煙酒爲大宗每年約收金二千九百餘萬鎊以上三項約得金一百兆鎊其餘印花稅地稅房屋稅郵電及各項雜件約收五千餘萬鎊統計每年約收金一百五十餘兆鎊而全國不以爲怨

反以得納稅款爲榮是又關於國民進化之優有非可強而致者此英國財政之情形也二月行抵法國該國國家銀行在歐洲大陸可稱巨擘其現存金幣有八千餘萬兆佛郎實爲各國銀行存金最多之數蓋其人民商賈工匠深信國家銀行所得資財除日用必需外苟有盈餘無論多寡皆存銀行以故積金最鉅其造幣廠仍隨時鼓鑄日出不窮且通行義奧比等國與其國幣並用上年英國銀行以商務阻滯周轉較難惟法國銀行能出鉅款爲之助力有非各國銀行所能及者惟法爲民主之國而政黨民黨各執一見凡國家籌款時有官民齟齬不相浹洽情事綜計法國歲入亦復不敷現議徵收進款稅以資補助此法國財政之情形也是月由法行抵義國查該國財政向來入不敷出近

三十年來極力振興農務日見發達計輸出之品以蠶絲酒果糧食爲大宗凡各國上項出產之所不足者皆取給於義國實爲致富之源現在各國經營政策不遺餘力皆有入不敷出之患獨義以農務富國而國用自充計所歷各國中能足以自給者惟義一國而已此義國財政之情形也旋由義行抵奧國該國財政所有租稅等項辦法與各國大致相同而皆有不足之慮獨其法良意美者則惟郵政儲金一事其意在爲民藏富而即以積纖成鉅之款利益國家考其所存之數目自一錢數分以上皆可購買郵券以爲儲蓄此項存金各戶籍計有八百餘萬之多每戶籍多寡之數不等實爲各國儲蓄銀行所不及者良由奧國郵政與銀行相表裏同心合作故便民與利國相資此奧國財政之

情形也閏二月行抵德國德爲聯邦新造之國全國稅則皆通行無阻初無疆域之分考其稅款大宗以進口稅爲最即如漢堡一埠整頓稅務興旺市場該處稅收每年約有五百兆馬克之鉅由於轉輸出入之品日見繁多而其相機酌定稅則亦復完善故其效爲最著其國中徵稅各項除普通額稅外有營業進款餘利等稅與英之進款稅辦法略同此項稅收每歲所入亦復不資又有鐵路餘利一項每年約入一百兆馬克該國經營路政極爲注意故其進款亦較他國爲優此德國財政之情形也是月行抵俄國該國地居寒帶領土最廣出產亦饒計歲入額款有二千四百餘兆盧布若無額外急需可供支應前年與日本戰事竣後全國安謐尙無拮据形狀其國力之厚於此可見現在庫存

金幣一千二百餘兆盧布爲各國國庫存金最多之數倘遇有國用不敷多借用法款積至九百餘兆盧布然庫存既多法亦願假以鉅款而造幣廠仍鼓鑄金銀各幣以時增添並於造幣廠內設造紙廠凡國家所用紙張自紙幣郵票以及契據車票文卷冊籍單據等項皆由廠自造以爲公家統一製造之權此俄國財政之情形也三月行抵比國比立國最晚經歐洲公認獨立後領土無多治理較易其地距法最近理財政策取資於法而尤以農工商三項爲重迭經度支部大臣與各大臣導觀銀行機廠商會植物園等處知其講求上項辦法最爲精審現在農工兩項成績品物輸出極繁實爲全國歲入鉅款其國家又從而鼓勵之蓋比國情形初不必以軍事爲急故能專力於農工商各務是

以呈效輕捷而國家生財之道即在於此此比國財政之情形也綜觀各國其現在情形與經營宗旨雖各有不同而由其效果以窺其規劃則大端仍復相合臣謹參觀比類考其原因徵諸成績而得其收效之重要大端請更進而言之曰公債國家資財之所自出要皆取給於民然多取焉則虐矣至於債則借而非取也各國公債盛行良由國家銀行皆收入債票以爲準備金故各銀行即視爲現款小民遂視債票爲私產無事時則藉息以養生有事時則售票而得本固由代售股票公司之機關亦由國家自取債票益以堅民之信而全國流通之理即在此矣一日畫一幣制各國於生金生銀生銅三品皆視爲貨貨有貴賤而幣無貴賤也以銅幣準銀幣而價如故以銀幣準金幣而價仍如



故若生金生銀之價值皆不與焉且幣制非爲一國而設又必須與各國之幣制互相比較以期大致一律預防外人操縱則彼此來往不致有盈絀之患一曰定虛金本位凡金不足者其本位必先預定使銀幣銅幣皆成附屬而銀幣銅幣之價卽由此而定苟本位不定價值紛歧而徵收稅課黠吏因而舞弊小民不免受累其商家之土貨輸出者又須俟匯回本金之時始知有無盈虧外貨輸入者其售出之時期又視匯價以爲漲落實爲政治商業之損害近來用金而並無存金之國其與他國通商者莫不定虛金本位然後國家之出入有常庶政之施行不窒商業之操縱有準農工之發達可期一曰造幣幣爲國家獨有之利既有利則私鑄私印者起故各國巡警偵探隨時嚴查蓋幣貴貨賤

凡生金生銀生銅三品無論成色皆視幣價爲低民間之生金生銀自相率而聚於造幣廠而又設交換各國大小幣處所使外人之入境者必須將各國之幣盡易本國之幣而匯費又從而取盈焉此國家造幣之大利也一日修改稅則各國訂立稅約皆有年限其預定年限之期必先計畫訂約期內凡已所缺乏者則稅則從輕凡已所盈餘者則稅皆從重使民間藉外貨以自給而土貨不因外貨而滯銷因時損益得自保其利權又歐洲列邦近年經營軍政民政用款日增大都入不敷出因有加稅之舉無論鉅細各款不難臨時籌集此蓋由稅則自有主權得以相機而進退之至其所以能進退之原因則惟以年限爲修改地步以修改爲加稅地步而已一日保護民間財產各國徵稅奇重而

民皆樂之良以小民擁有資財深虞攘奪而無力自爲防範有官以保護之乃能專心致志以自營其業其稅課或什一焉或倍蓰焉若相忘也蓋以己之資財由保護而積非經營之力也各國於民事訴訟法商法大率主護產居多至於裁判巡警各官其於保護財產尤爲加意此卽百姓足君孰與不足之義也一日國有營業凡銀行輪路郵電農鑛鹽煙酒糖印刷各項多屬國家自辦其所支出分別成本經營兩項不視行政經費之消耗品其經理員不論官民純以商人性質相待但綜其預算決算責成其營業之得利與否而已有官獨辦者有官商合辦者有官辦商附者有商辦官助者有舉內債者有借外債者大率經營開創遺大投艱非官力不爲功其合辦者祇分餘利而於政治上之牽

涉概不與焉蓋國有經營之性質固如此也以上七項皆經營財政最重要點爲現在各國惟一之辦法臣猥膺使節仰體朝廷參考列強之意因舉其現辦之情形暨共同之大旨確切臚陳用備聖明採擇臣愚尤有進者各國所辦各項財政收效甚速而我國獨遲夫我國人民未必貧於他國人民也所異者他國人民願出其資財以投之公家公家藉其資財以利其人民耳方今預備立憲民智日開國債之深國用之乏昭然與天下相見凡我國民漸非故見自封已日有愛國急公之念伏願皇上於理財各項要政取列強之成法合臣庶爲一心我國財政進步之機端在於是此尤臣所惓惓於心而不敢緘默者也所有微臣考察各國財政情形緣由除咨部外理合恭摺具陳伏乞皇上聖鑒訓

示謹奏宣統元年十二月二十一日財幣檔

財幣檔

外部致袁樹勳葡外部稱現無兵艦赴澳希飭曉諭電  
申前因各報謠傳葡派兵艦三艘前往澳門又云中葡商准維持舊狀  
如葡國因該處滋事受虧中國願任賠償云云當將派艦一層電駐葡  
代辦探詢有無其事據覆稱據葡外部稱兩月前曾派巡洋艦一艘前  
往遊歷現無兵艦赴澳等語該項巡艦已否抵澳既係巡洋遊歷自可  
無庸驚疑報內維持舊狀一語彼此誠照約商明至認賠之說實無其  
事現粵省正在人心不靖難免不輕信謠言致滋誤會希飭屬分別曉  
諭以釋羣疑而弭事端並電覆外十二月二十四日澳門檔

外部致陳昭常鈔送瑋延設關與俄使往返照會函

逕啟者揮延設關事迭准電詢俄日抗議情形查此事俄則抱定陸路通商章程不肯放棄其應得之利益日則視俄所得特別利益意在均霑中俄陸路舊約既未能一時遽廢百里免稅三分減一辦法滿洲里綏芬河各關亦尙照辦今欲漸次挽回權利自必多費筆舌惟東省沿邊開埠設關之處已多若不設法力爭實恐紛紛援照伊於胡底茲將本部與俄使往返各照會鈔送冰案以期接洽駁覆日使照會容後辦出再行鈔寄除電覆外專此密達順頌勛綏

十二月二十八日商埠檔

### 署粵督袁樹勳覆外部據澳督云葡艦或來中國電

前奉二十五日電葡艦遊歷事據前山同知香山縣電稱葡艦尙未到澳適澳督中軍官到前投拜詢據聲稱此係葡國照例派往各國遊歷

之艦或須來中國一行報紙恐屬誤會等語至該處紳士經該同知等邀集至署將大部前電切實曉諭矣謹電聞樹勳勸

十二月二十九日澳門檣

### 日俄法使致外部借美款建築錦瓊鐵路事務請慎重

照會

附照會八件

一日使伊集院彥吉致外務部照會 爲照會事前因錦瓊鐵路之事曾與梁尙書面談並道本國切望之意刻曾電請本國政府訓示今得覆電囑於此事須格外小心本國政府因茲事體大不能遽允所求惟本大臣日前面談曾言及此路關繫日本利益甚大故無論中國作何主見應先聽本國核准倘使本國竟爲所蒙或不關照本國則兩國邦交之險實在令人難以預算茲特備文警告務宜審慎從事須至照會



者一千九百十年一月三十一日即十二月二十九日

二俄使廓索維慈致外務部照會 爲照會事昨與貴大臣面談欲令本國幫助錦瓊建築之事當即電詢本國茲得覆電如下  
俄國政府對於此事視爲非常鄭重必須細加研索故目下無可答覆  
俄國出使大臣可親告外務部如下

俄國政府希望中國政府錦瓊鐵路之事非先與俄國商議萬勿從事不然則兩國邦交諸多窒礙云須至照會者俄歷一千九百十年二月二日

三俄使廓索維慈致外務部照會 爲照會事頃接得本國政府於錦瓊鐵路之事照會如下

俄國出使大臣業經接得本國政府對於美國錦瓊鐵路之議曾經電

覆美國如下

美國既邀俄國與聞錦瓊鐵道之事並允俄國可再思答覆俄國意見以爲事前既未知照俄國故俄國於此事業不欲與聞美國不免誤會請將此借款停止俄國希望凡事未先與俄國商議勿行定奪云云本大臣今將來電鈔送貴部並知照事前如未與俄國商量勿冒險定局云云須至照會者俄歷一千九百十年二月四日

四俄使廓索維慈致慶親王書 敬啟者本大臣曾經面談並照會貴部錦瓊鐵路之事茲據政府訓示反對美國滿鐵中立之議茲將來文鈔錄奉上此請崇安附鈔件俄歷一千九百十年二月八日

美國囑詢建造錦瓊鐵路之舉俄國政府切實聲言此舉於俄國利

益有非常關繫此路若成非但接連北滿鐵路之南端並且在瓊瑯  
實與俄國邊界相接直使軍務警務大受影響而使滿洲鐵路所通  
東蒙古北滿洲情形改變故此事必須詳細查詢始能定見倘使俄  
人不知其詳萬不可行俄政府對於此事甚爲審慎故所有計畫應  
先爲知照俟俄國鄭重審定以後自應將該路應如何建造情形早  
爲答覆至於以後凡在滿洲中國欲借款造路第一應先商知於俄  
國俟俄國察視有礙俄國或北滿洲軍警兩界否再行將該路如何  
建造之處持平辦理定見施行云云

五日使伊集院彥吉致外務部照會 爲照會事日本政府對於錦瓊  
建築視爲極要之舉因此事使南滿洲鐵路財產大受影響也惟中國

主見既欲趕爲建築以便開通蒙古滿洲兩處日本政府再三設想如  
依下開各項日本政府可幫助此路之建築云云

一日本欲於錦瓊鐵路借款雇用工程司購買材料建築工程悉與份  
其事其應如何與份之法俟與列強和衷商議後再行定見

二至於錦瓊鐵路與南滿洲鐵路欲聯軌之處中國政府應從錦瓊鐵  
路某車站間造一支路接連南滿洲鐵路南端車站該路應如何佈置  
及接連南滿洲之法必須與日本政府妥議後行

日本政府以錦瓊鐵路之建築於南滿洲鐵路大關緊要所以亦贊成  
者因現在之計畫係從錦州起點經過洮南距南滿洲尙遠若將來計  
畫又有更變日本政府必須干涉與聞其事云須至照會者 一千九百十

年二月十四日

六法使馬士理致外務部照會 爲照會事法國政府因爲中國謀平和起見請中國政府於錦瓊鐵路之事事前未與日俄商量勿遽定議如此可免各國滿洲之競爭並可增進其在亞洲之幸福云

法國公衆政府對於中國利益勿使遠東有所齟齬並欲使列強在亞東永遠和好陳其意見如下

中國倘建造錦州至瓊瑋之鐵路事前不可不關照日俄兩國政府云須至照會者西歷一千九百十年二月十八日

八俄使廓索維慈致外務部照會 爲照會事貴部曾面詢本大臣俄國政府對於錦瓊之建築有何種意見本大臣當即電詢本國去後茲

得本國覆電謂錦瓊鐵路之建築於俄國之邊界商務兩有傷礙按照光緒二十五年條約一千八百九十九年中國政府曾允北京以北之鐵路如欲借款建造必須先儘俄國現在倘使與俄國邊界商務一無所損俄國亦非必執索踐言無如據俄國鐵路調查員報告謂錦瓊鐵路若成俄國滿洲鐵路所受之傷損每年須損失五萬萬盧幣而中國備款收回須在二十九年之後或直至七十三年之後始能無費收回故俄國政府以爲現在計議此項合同之資本家本無政治手段在內是錦瓊鐵路亦未嘗不可移建他處是於商務可得同等利益而使俄國亦不受虧損列強資本家當亦不致起而反對

俄國既有以上意見故提議將錦州至瓊瑋建造鐵路暫行罷議而從

張家口造一路至烏拉圭或再展至恰克圖直達俄國邊境爲止聞此  
路中國久思建設是中國當必與外人意見相同中國現狀頗處困難  
者以未得西比利亞交通之故俄國政府不欲使中國處於困難地位  
甚願在貝加爾與恰克圖之車站間建造一支路交通其間惟中國如  
建造張恰鐵路應令俄人與有資本在內俄國政府深望中國人對於  
此舉須深明其意庶可和衷共濟有益兩國總之俄國政府亦甚願中  
國在滿洲境內借款造路倘使與其滿洲鐵道利益邊境無損決無間  
言故俄國以友誼之故陳其意思以上所言業經照會美國列強云須

至照會者俄歷一千九百十年三月六日

清宣統朝外交史料卷十二終